

国朝耆献类征初编

國朝耆獻類征初編

國朝耆獻類徵初編卷八十七目錄

卿貳四十七

金甦

竇光鼐

覺羅奉寬

張泰開

閻循琦

邁拉遜

宗室賽爾赫

國柱

賦類四十五

總集詩林卷八十五目錄

國朝耆獻類徵初編卷八十七

通奉大夫前署江西巡撫江西布政使司布政使湘陰李桓

卿貳四十七

金姓

嗚呼珪何能銘吾師耶蓋自丁卯以來四十年門生勵有存者珪
何敢辭公金姓諱姓字雨叔號海住先世由會稽遷杭爲仁和人
曾祖諱明遇江南興化縣主簿祖諱星瑞雲南師宗州知州考諱
德麟三世並以公貴 誥贈榮祿大夫曾祖妣褚祖妣朱聞人妣
嚴皆 誥贈一品夫人兄弟四人公次三行六伯諱虞康熙庚子
舉人歷湖北孝感山西蒲縣知縣所稱長孺先生者也長孺先生

以文雄於浙長公二十有二年以兄兼師及公學大成遂競爽焉
年二十一應縣試冠其曹入仁和學爲諸生明年癸卯舉於鄉會
試報罷歸益肆力於經史自司馬遷以下諸史窮年點勘數番不
輟旁及他子集皆手錄考訂故其根柢之學莫邃焉歲戊申秋母
夫人感寒疾暴下殆甚公在外聞之狂奔歸中途顛天願手寫華
嚴經全部歸而母僵臥氣息縷縷公俯首入衾以口鼻熨其臍嘘
呵之良久腹中有聲稍安眠乃投以藥竟於是日浣手書經闕十
二年而訖功其誠孝如此公淹公車者二十年中閒客游山東者
久之歲甲寅丁外艱丁巳奔母夫人喪力疾行抵臨津挈囊趁舟
躓折一齒困甚時長孺先生自孝感歸卜葬考妣得吉壤於南山

之普福嶺乾隆六年秋以錢塘梁文莊公薦授國子監學正明年
壬戌會試中式第一人闈卷進呈上屢稱可之殿試一甲
一名進士及第授職修撰甲子主廣東鄉試乙丑散館一等一名
教習庶吉士丁卯充順天鄉試同考官珪卷出公房既定第六名
撥入湯葑岡先生房先生爲公壬戌同榜探花邸寓橫街與公對
門珪謁葑岡先生曰子固我同年金海住所薦也當謁金師珪卽
夕謁公公進而教之甚至明年夏署日講官起居注又明年遷右
贊善尋轉左十六年實充講官興縣孫文定公奏充御纂詩經
館纂修王申副漳浦蔡葛山先生典江西鄉試是夏六月御試
翰詹二等擢左庶子冬授侍講學士明年癸酉主山西鄉試甲戌

充會試同考官奉 命督學安徽公校士公勤竟日坐堂皇披閱
巡行士習帖然任滿二十二年奉 旨在上書房行走冬授詹事
府詹事自是直講席者十七年直諒誠敬所陳說必正義法語於
學行根本尤惓惓三復以是 諸皇子 皇孫皆心重公公之品
學真不愧是選也乙酉奉 命督學江西請假由浙展墓乃赴任
明年授內閣學士又明年擢禮部左侍郎三十七年奉 使祭告
南海時公子三吾作令於粵東得侍左右公扈 駕謁 泰陵暨
南巡者各一木蘭者七賡歌之作成帙三十八年五月當從
蹕熱河邁疾仆於直次諸城劉文正公以 聞 予假秋九月奏
請解任得 旨准其回籍調理明年秋疾瘥乃得出都 諸皇子

皇孫及同直同朝諸公皆贈以詩歌比之二疏有餘榮焉丁酉
入京謁 孝聖憲皇后梓宮再詣 諸皇子 皇孫執手相勞
上賚大緞 命卽歸越二年撫臣奏主敷文書院講席四十五年
上五幸浙江迎送 駕問賜有加於是講課之暇常羊湖山與
錢嶼沙方伯吳崑田編修諸公皆皤然達尊爲五老六逸會旬月
無閒賦詩談讌鄉黨望爲神仙珪己亥典閩試庚子視學於閩過
杭再謁公公偕顧河干先生飲珪於西湖舟中神明續密杖履從
容珪竊歎以爲非學養之深厚不能及也公生平廉儉方正處事
無鉅細井井有法度詩文數千篇無體不具尤長於使事在直廬
與陳句山諸公倡和限險韻數十疊不解益彊辛丑開八表作長

律八十一首該贍精警不減少壯性篤於孝友事兩兄暨一弟肫
如也至於族戚年家若吉凶緩急謀之竭忠不愛己力其取受必
以義雖一介不苟此珪所心折於吾師而亦非一人之私言也壬
寅秋以疾考終公生於康熙四十一年壬午八月十五日亥時終
於乾隆四十七年壬寅七月九日寅時壽八十有一配王夫人先
公卒 誥贈一品夫人繼室胡夫人 誥封一品夫人治家協德
乾隆五十三年五月八日壽終年八十有五子三三事先公卒三
吾乾隆丁酉科舉人廣東四會縣知縣候選郎中三俊太學生議
敘鹽大使女子四長適國子監學錄王君喆次適吏部文選司主
事汪君孟錫其次子修撰如洋庚子會試 殿試皆第一克繩公

武云次適泰州運判姚君思康次適監察御史汪君日章孫男二
萼密孫女六某年月日合葬於某銘曰

斗魁戴匡厥眾正方公秉其氣不嚴而莊讀書萬卷老而不忘引
年耆造湖山輝光有老門生校文公鄉銘公冢石擲筆涕滂

右墓誌銘朱珪撰

公姓金諱珪字雨叔號海住其兄虞故宿學也人稱長孺先生教
公爲文溺苦不休夜臥轉側時聞諷倍生有至性母患腹疾公以
口熨臍而噓呵之疾遂平舉世宗元年鄉試今上七年會試
廷試俱第一授翰林修撰尋遷至正詹內閣學士禮部侍郎三
逢御試皆上親擢冠首受知最深以故衡文之任重疊委用

凡典試廣東江西山右者三督學安徽江西分校禮闈者二或未
散館未撤棘 寵命先下或許持節便道上冢皆異數也所莅處
嚴關防減夫役飭條約卷雖盈萬皆手披而目及之往往搜得遺
珠爲幕府補過或生童文字未協代爲改削如訓子弟然有被黜
之人捧落卷而感泣者 上命公行走上書房課 諸皇子前後
入直十有七年卯入未出敏勉勤慎從無休沐之請遇事納規忠
心拳拳緝承華法戒一書備 青宮觀覽壬辰秋扈 駕熱河馬
驚墜地 上慰問者再遣醫治痊次年五月入直胃痛僨作中使
扶歸具疏乞休 上許之出都時 諸皇子不忍良師之去握手
歔歔賦詩贈行問承華法戒書成否同僚及門下士餞者麻集車

馬駢麟供張塞路大司農王文莊公見而歎曰吾輩異日出都得如是光榮足矣先是公奉命祭南海適公子三吾卸篆翁源趨庭侍奉士論榮之少苦家貧通籍後依然儒素每食二簋鬱肉漏脯不以爲嫌任學使時皖江學租故事給貧生外皆因公開除公鈐封其餘交提調備修文廟其廉儉蓋天性也然於濟困扶傾之事慷慨仔肩內宗族外師友周恤倍至歸座主仲公永檀之櫬繼世好怡雲鄂公之粟葬故交晚菰居士之四代八棺見義必爲無絲毫顧藉予告後掌教萬松書院生徒來不冠不見曰吾教之以禮也雖篤老而纂思奮筆終日孜孜春秋佳日與鄉里耆英爲五老六逸之會嘯歌湖山薨年八十一所著清語錄十九帙史漢

評林訂誤若干卷詩八千餘首子三人

贊曰枚生八歲卽讀公闡墨欽若天人後入館閣先公一科及公侍直禁廷而枚已外用五十年來末由瞻接但聞公愛枚文向人口之不置薨後長君奉公遺命具狀乞傳余敢不表章前哲亦以報知己哉客春遇公次子三俊於蘇州爲枚校詩集指示誤用漢書北史二事想見公趨庭之教所貽謀者遠矣

右傳袁枚撰

金海住侍郎姓中壬戌狀元直上書房質莊親王爲其弟子公善時文應制詩王善學之卒以名世公性直遇諸皇子有嬉笑者卽面折之時禁廷詞臣皆有所貢獻公遇萬壽節貢萊石菊

花一枚號曰東籬壽友同事者誚其舛鄙公曰天子富有四海何所不備奚賴吾輩措大所貢獻其所以收納者聯君臣之情故爾此物雖無所珍惜然貢諸丹陛亦野人獻芹意耳人皆服其誠樸云

右錄宗室昭槿撰

公少偕兄虞砥礪問學允淹貫史事及第授修撰典甲子廣東鄉試散館復第一丁丑在上書房行走公言養正之地殫竭微忱用資啟導不易膺斯任也先後侍書十七年自孝友大端至言動威儀之節罔弗盡言累遷內閣學士晉禮部侍郎告歸主講敷文書院年八十一卒入祀鄉賢公在都時捐金贖資枋仁錢會館部署

周備至今鄉士棲止如歸

公次女幼時一日於中庭忽大驚怖家人問之云見一藍面人從天而下以魁星像示之云所見正同是年壬戌科公得會狀然獨次女見之未喻其故後女適汪康古庚子科公外孫汪如洋亦得會狀乃悟魁星示像而次女獨見者蓋狀元之女而又狀元之母也公聞外孫大魁寄次女詩云當年會狀憐嬌女今見教成會狀兒亦科名中一段佳話也

右聽松廬詩話張維屏撰

姓長於論文悉心校閱所至稱得士安徽學租舊於給貧生以外公事報銷姓盡鈐所餘檄提調備葺繕學宮當事問遺止及茶葉

無編紵之受

右杭州府志符保森錄